



### **Gésturi: sa VII Editzioni de sa Sagra de s'Isparau est andata beni meda**

Su 24 de Martzu in Gésturi ant fatu sa VII Editzioni de sa Sagra de s'Isparau aresti, cuncordada de sa Pro Loco de Gésturi impari a s'Amministratzioni Comunali, e cument'e dónnia annu at partetzipau unu muntoni de bisitadoris benius de dónnia parti de sa Sardigna.

Sa bidda, totu allichidia a festa, fiat prena de genti benia a biri is artigianus chi ant postu in ammosta is òberas insoru e is paraderis chi bendiant is prodotus de su territóriu, e a tastai is ispecialidadis típicas. In prus, giai in dónnia bia e pratza, e in is domus abertas a is bisitadoris, ddoi fiat a bendi s'isparau gesturesu, chi totus ant apretziau meda.

Ma sa Sagra no est istétia isceti s'ocasioni de papai beni e de tastai sa coxina gesturesa: gràtzias a is ispetàculus e is propostas culturalis, sa genti nci at pótziu passai unu bellu domigu de ispàssiu.

Po su chi pertocat s'avaloramentu de su territóriu, is bisitadoris ant pótziu fai un'essida in su Parcu de sa Giara; in prus, a totu dí, ant pótziu bisitai su Museu de sa Giara, gràtzias a sa Fondatzioni "Altopiano della Giara".

E no est ammancau, cun su banghitsu suu, “Su Castagneri”, su Maistu Turronaju, chi at ammostau cumentis si fait su turrone, trabballendi-ddu cumentis si faiat in is tempus antigus, e a pustis ddu at fatu tastai a totus.

Sa genti at cumentzau a aprobiai giai de bonu mengianu, tanti chi sa bidda s'est prena luegus de turistas: a ddu allirgai, sa “SeuinStreetBand”, una truma de picocus, sonadoris bravus meda, bistius in blugíns e sa malliedda de unu bellu colori grogu brillanti, chi ant girau sonendi in totu sa bidda, ispainendi is nodas de música *funky* e *soul* cumentis isceti issus isciint fai, e faendi ispantai a mannus e pipius.

A merí, imbecis, est istétia protagonista sa truma de is “Boes e Merdules” de Otzana, chi est essida in parada in is bias de Gésturi; prus a tradu, is grupus “A Ballare” e “Festajolos” chi ant sonau e cantau po totus is presentis.

A ora de prandi, is bisitadoris ant pótziu tastai unas cantu ispecialidadis, antipastus, primmus e segundus, fatas totus a basi de isparau.

Po su chi pertocat is eventus culturalis, a totu dí in sa sea de sa Pro Loco ddoi iat un'ammosta a incuru de su Grupu de Alessandra Sorcinelli, cun òberas de iscritoris e poetas, pitoris, iscultoris e àterus artistas; in prus, a meigama, Alessandra Sorcinelli etotu at fatu sa presentada de unus cantu líbburus, e is de su Grupu ant fatu “leturas emotzionalis” de contus e de poesias: unu bellu momentu de ammisturu de sentidus e chistionis, fintzas de is prus dilicadas, chi isceti s'arti de sa prosa e de sa poesia nci arrennescint a favoressi.

A serrai custa bella dí de cumentzu de beranu, po acabbai in sa mellus manera, ananti de unu muntoni de genti, in pratza ant sonau is picocus de su grupu “Tieni il Tempo”, su grupu-tributu a is 883.

Una manifestatzioni beni cuncordada e praxili chi at agiudau su territóriu de Gésturi a si fai connosci ancora de prus in totu sa Sardigna, una Sagra aundi is bisitadoris ant tentu sa possibilitadi de apretzai totu is bellesas de sa bidda, de su territóriu, e fintzas is ispecialidadis típicas de su logu.

Sa Pro Loco, cun s'agiudu de su Comunu e de totu is Gesturesus, est arrennescia a fai unu trabballu de grandu importu po totu sa Comunitàdi.

\*\*\*

SA MARMIDDA CHISTIONAT IN SARDU - Progetu finantziau cun su dinai de sa Regione Autònoma de Sardigna cunforma a sa L. 482/99 e a sa L.R. 22/2018.

